

GRIFFITH, MOSES (1747 - 1819), arlunydd mewn dyfrlliw

Enw: Moses Griffith
Dyddiad geni: 1747
Dyddiad marw: 1819
Priod: Margaret Griffith (née Jones)
Rhyw: Gwryw
Galwedigaeth: arlunydd mewn dyfrlliw
Maes gweithgaredd: Celf a Phensaerniaeth
Awdur: Megan Ellis

Ganwyd 25 Mawrth 1747 yn Nhrygarn, ym mhlwyf Bryn croes, Sir Gaernarfon. Bedyddiwyd ef ym Motwnnog a chafodd ychydig addysg yn yr ysgol rad a gedwid yno gan y rheithor, y Parch. Richard Thomas. Cyflogwyd ef fel gwas gan **Thomas Pennant** y naturiaethwr yn 1769, ac ar ôl iddo sylweddoli ei allu fel arlunydd trefnodd Pennant iddo deithio'r wlad gydag ef er mwyn paratoi darluniau ar gyfer ei wahanol lyfrau.

Yn *A Literary Life ...* cyfeiria Pennant ato fel arlunydd ac ysgythrwr medrus a chanddo hefyd gryn allu fel cerddor. Bu'n gydymaith i Pennant ar ei holl deithiau o 1769 hyd 1790, a defnyddiwyd ysgythriadau o'i waith fel darluniau mewn amryw o weithiau argraffedig ei feistr, yn enwedig yn y cyfrolau'n disgrifio'u teithiau yng Nghymru ac yn yr Alban. Y mae llawer mwy o'i ddarluniau dyfrlliw gwreiddiol ar gael, yn enwedig darluniau o eglwysi a phlastai a golygfeydd eraill yng Nghymru a Lloegr, a defnyddiwyd nifer ohonynt i addurno copiau argraffedig o waith Pennant. Moses Griffith hefyd a fu'n gyfrifol am lawer o'r darluniau o anifeiliaid, adar, a physgod a geir yn llyfrau Pennant ar hanes natur, a gwelir ei fedr mewn cangen arall o'r gelfyddyd o astudio'r gyfres o bortreadau a wnaeth ar raddfa mân-ddarluniau.

Ar ôl marw Thomas Pennant yn 1798 bu Griffith yn gweithio i'w fab, David Pennant, ac yn ystod y cyfnod 1805-13 gwnaeth o leiaf ddeucant o luniau dyfrlliw o olygfeydd Cymreig.

Yn ôl cofrestr y plwyf yr oedd yn byw yn Whitford ger Holywell yn 1781, ac ymbriododd yno â merch o'r enw Margaret Jones o'r un plwyf. Ganed iddynt ddau o blant. Yn ôl llythyr oddi wrtho yn *The Gentleman's Magazine* ym mis Rhagfyr 1809 cartrefai yn Wibnant, ger Holywell, ac yno y bu farw 11 Tachwedd 1819. Claddwyd ef yn Whitford 15 Tachwedd.

Y mae yn Llyfrgell Genedlaethol Cymru nifer fawr o ddarluniau dyfrlliw o'i waith, yn cynnwys darluniau o eglwysi a phlastai a golygfeydd yng Nghymru, nifer o bortreadau ac yn eu mysg ddau ohono ef ei hun, ac amryw o gyfrolau argraffedig a llawysgrif o waith Pennant yn cynnwys rhai cannoedd o ddarluniau gwreiddiol gan Griffith. Ceir casgliad o'i waith hefyd yn Amgueddfa Genedlaethol Cymru, ac enghreifftiau ohono yn yr Amgueddfa Brydeinig ac Amgueddfa Victoria and Albert (Llundain) ac mewn amryw o gasgliadau preifat yng Nghymru.

Awdur

Megan Ellis, (1906 - 2001)

Ffynonellau

Country life, 2 Gorffennaf 1938

Walker's Monthly, Awst 1938

The Gentleman's Magazine, Rhagfyr 1809

Cylchgrawn Llyfrgell Genedlaethol Cymru, i

Adroddiad1938, LI.G.C

Darllen Pellach

Teithwyr Chwilfrydig: **Bywd a gwaith Moses Griffith**

ODNB: **Griffith, Moses (1747-1819)**

Erthygl Wicipedia: **Moses Griffith**

Gweithiau

Art UK: **Moses Griffith 1747-1819**

Dolenni Ychwanegol

VIAF: 75365623

Wikidata: **Q6915789**

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/>



Arddull APA



Ellis, M., (1953). GRIFFITH, MOSES (1747 - 1819), arlunydd mewn dyfrlliw. *Y Bywgraffiadur Cymreig*. Adferwyd 11 Tac 2024, o <https://bywgraffiadur.cymru/article/c-GRIF-MOS-1747>

Clippwr

Preifatrwydd a Chwcis
Hawffraint
Y Prosiect
Cymorth
Cysylltu

LGC
NLW

LLYFRGEL
THE NATION

